


www.BibleForChildren.org

uMataayi 26



Lwe zyasyala insiku 6
ishikulukuulu isha
Pasaaka kufiha, uYeesu
ahasogola havhili ku Besaniya,
inkaaya ye ahalandilaga uLaazalo
we uYeesu ámuzyusiizeye.




Pe uMaliya ahanyatula
insupa iya mafuta aga
nsavho impiti havhili ge
gakununshila, ahamwitiilizya
uYeesu mu vinama vwakwe
nu kumusyumula ni nsisi zyakwe.
Inyumba yonti yihiizula umununsi
umwinza uwa mafuta igo.




UYuuda uwa ku Kaalyoti, we áamile wooka mu vhasundikwa vhaala 12, ahasogola kumwaniila uYeesu ku vhapiti avha vhapuuti kuuti avhalongole kumulema uYeesu.

Lwe vhiivwa vwe akuyanga vhahaseshela, vhahati kwe vhaamupe impiiya. Woope ahanda kulondola ahavhaliilizyo ahinza aha kumwaniila uYeesu.



Avhasundikwa ivho vhahasogola nu kuvhomba inza vwe uYeesu ávhalajiziize, vhahasengaanya ishaakulya isha Pasaaka. Lwe vhakulya, uYeesu ahanyatula ikaati, ahaliloota, ahalimensula, ahaavhapa avhasundikwa vhaakwe, ahavhavhuuzya ahati, “Nyatuuli mulye, uno we muvhili waane.”



Havhili, ahanyatula ulupindi lwe
lwáli ni divaayi, ahamusalifwa
uMulungu, ahaavhapa, ahati,
“Mumwele mwentí. Iga
mavhanda gaane aga lufingwi ge
gakwitiha kuzya vhanu avhinji,
inga uMulungu avhaswile
uvhutalamalandu vhwavho.”



UYeesu ahati, “Siimoni, Siimoni! Umanyane ahinza kuuti uSeetano amulaavile uMulungu nu kwitishilwa kuvhalinga imwe, inza uhavuna uwa ngana vwe akupementa ingana yaakwe. Ileelo ine, nkulavhiiye kwa Mulungu, inga utahinze uleshe ulwitiho lwaho kuli ine. Niiwe lwe wangalushila ine, uvhagomwe na vhamwinyu.”



USiimoni ahati, “We Mwene! Ine njifumwizye kuvha
niwe, yivhe kwe kukungwa mu jeela, poosye yivhe
kwe kufwa!” UYeesu ahamwamula ahati, “Peeteli!
Nkukuvhuuzya kuuti, ileelo inkanda lwe yishiili
kuvhilishila, kuuti uvhe wankaana lutatu kuuti
utamanyile.”




Pe uYeesu ahasogola na
vhasundikwa vhaakwe pa
shilimbika shimo she
vhahatinji iGetisemaani.
Lwe aafiha penepo
ahavhavhuuzya
avhasundikwa vhaakwe
ahati, “Mutendame ipa,
ine nasogola paala
kumulaavha uMulungu.”



Ahati, “Taata, ku kwaho
zyonti zikuvhombeka,
nkukulaavha kuuti
uneefwezye amayimba
iga. Ileelo te vwe
nkasiime ine, nkandi vwe
ukasiime weewe.”



Pe ahayiposheela impuga iya vhasikaali na vhavhomvi vhamo kufuma ku vhapiti avha vhapuuti na Vhafalisaayi, ahasogola navho pa shilimbika isho. Lwe vhakusogola, vhányatuuye inyaale na mazondolo ni vilwilo. Pe wumo muli vhuuvho ahamuhoma umuvhomvi uwa mupuuti umupiti, ahamudumula ni ipanga ikutwi ilya kundiilo. UYeesu ahayanga ahati, “Leha kuvhomba izyo!” Ahalema ikutwi ilyo, ahamuponia.



Pe avhantu ivho vhahamulema uYeesu, vhahamutwala mu nyumba iya mupuuti umupiti. Woope uPeeteli ahavhanga akulandata mwisinda ukutali. Avhantu

ivho lwe vhaafiha mu nyumba iya mupuuti umupiti, vhahapemba umwoto pahati pa luvhungaano, vhahatendama kwota. Woope uPeeteli ahapalamila, ahatendama pooka navho.



Ileelo wooka mu vhazya
avha mupuuti umupiti,
we áali mujenzi uwa
muntu ula we uPeeteli
ámudivile ikutwi,
ahamuvhuziilizya ahati,
“Vhuli, te weewe we
naakuvhwenyi uli pooka nu
Yeesu mu shilimbika?”
UPeeteli ahahaana havhili ahati,
“Te neene.” Ahavhaliilizyo
hanaaho inkanda yihavhilishila. Pe
ahafuma panzi nu kukuuta ku
vhuswimiilizu nkaani.




Pisinda, avhapiti vhaala vhonti avha
Vhayuuda vhahimiilila,
vhahamutwala uYeesu kwa mupiti
waavho uMuluumi we izina lyakwe
vhahatinji uPilaato. UPilaato
ahamuvhuziilizya
uYeesu ahati,
“Vhuli, iwe we Mwene uwa
Vhayuuda?” UYeesu
ahamwamula ahati,



“Iwe we wayanga.”




UPilaato ahanzaga kumusatulila
uYeesu, pe ahayanga havhili na
vhantu vhaala. Ileelo avheene
vhahonjezya kuzuma ahalanga,
vhahati, “Muhomeele pa
shihovhenkanyo!
Muhomeele!”




Pe uPilaato ahamuvhiiha uYeesu mu nyoovhe zyavho, inga vhamuhomeele pa shihovhenkanyo. Pe avhasikaali vhahamunyatula uYeesu vhahasogola nawo. Lwe avhasikaali vhakumunyatula, uYeesu ávhusiize ishiovhenkanyo shaakwe, nu kufuma mu nkaaya. Ásogooye nasho pamo pe mu njango iya Shiyalaamu vhahatinji pa Goligoota, kwe kuuti Ipangaawe ilya Itwe.



Lwe vhaafiha ipo, vhahamuhomeela
uYeesu pa shihovhenkanyo. Havhili
apenepo vhaavhahomeleeye avhantu
vhavhili mu vihovhenkanyo
vwavho, wumo
ku luvhazu
ulwa kundiilo
ulwa Yeesu,
uwamwavho
ulwa kumongo.



Kwandila ahavhaliilizyo aha vhushenzelo kufishila saala 9, ishiisi shihagwa insi yonti, izuvha litahalamaga. Umwenda we wápituliinye iNyumba iMfinjile, wuhazeepuha pahati kufuma pamwanya kufiha pansu. UYeesu ahavhilishila kwi izwi ipiti ahati, “We Taata! Nkuyivhiiha mu nyooovhe zyaho.” Lwe ayanga izyo, ahafwa.



Lwe haafiha hamazuuvha, ahinza
umuntu wumo we vhahatinji
uYoosefu, uwa mu nkaaya
iya Alimataayi,
ahayigomwa, ahasogola
kwa Pilaato,
ahamulaavha kuuti
anyatule ishaala
isha Yeesu, inga
ashisyile.

UYoosefu
ahashindikwaga
nkaani, áamile wa mu
lukuvhato ulwa
Vhayuuda, woope
ahavhugulililaga
uvhumwene uvhwa
Mulungu.




UYoosefu ahakala umwenda umwinza
umuzelu uwa kumusyilila uYeesu.

Ahashiisya ishaala pa
shihovhenkanyo,
ahashigwinshila nu
mwenda we ákazile,
ahashisyila mu
mbiipa ye
yábaniilwe mwi
iyalaawe.


Ahaligalagaasizya ivhwe
ipiti pa mulyango uwa
mbiipa.



Isiku lye likulandata, lye lyáli lya
Sabaato, avhapiti avha
vhapuuti na Vhafalisaayi
vhahavhungaana kwa
Pilaato.




Pe vhahamuvhuuzya vhahati, “We
mwene, tukukumbuha kuuti lwe
we akuhopenkanya ula
mupuuma, áyanzile a
’tili, ‘Lwe zyatuuha insiku
zitanu, ndizyuha.’”



Pe vhahasogola ku mbiipa,
vhahavhiiha ishimanyilo
pi ivhwe, inga atahaavhe
umuntu uwa kulisegusya.
Pe avhalongozi ivho
vhahavhaleha
avhasikaali pepaala,
inga vhayigulilaje
imbiipa.



Lwe isiku ilya Sabaato lyatuuha,
inzanshi lwe kukuvhambunkana
Pamulungu, uMaliya uwa ku
Magidaala nu Maliya
uwamwavho,
vhahasogola kwenya
imbiipa yiila.




Yeenya, ishisumbi ishipiti shihafumila,
mwe pe uhavhizya uwa MWENE
uMulungu áyiisile kufuma ku
mwanya, ahapalamila
pa mbiipa,
ahaligalagaasizya
ivhwe liila ku luvhazu
nu kulitendamila.

Lwe avhasikaali
vhaala vhamulola,
vhahogopa nkaani,
vhahatetema nu
kuvha ngati
vhantu vhe
vhafuuye.



Ileelo uhavhizya uyo ahavhavhuuzya
avhantanda ivho ahati,
“Mutogopaje! Imanyile kuuti
mwinzile kumulondola
uYeesu we aahomeliilwe.
Ataliipo ipa! UMulungu
amuzyusiize, inza
vwe ávhavhuziize!




Yeenyi pe
vhaamukasiize.”




Pe avhantanda vhaala vhaheepa
naluvhiilo pa mbiipa kwi lyoga nu
luseshelo ulupiti. Vhahashimbila
kusogola kuvhavhuuzya
avhasundikwa avha Yeesu inza
vwe uhavhizya uyo
ávhavhuziize.



Lwe vhakusogola, naluvhiilo
uYeesu ahahomaana na
vhantanda ivho, ahavhalamuha
ahati, “Mwakaata!” Pe
vhahapalamila vhahamulema
ivinama nu kumusugamilila.





Isiku ilyamwavho uYeesu ahavhaloleshela vhaala 11,
Iwe vhakulya ishaakulya. Ahavhapilila, mwe pe
amooyo gaavho gáamile magomu, havhili, mwe pe
vháhaanile kuvhiitiha vhe vhamuvhwenyi Iwe azyuha.
Pe Iwe ayanga navho, uMwene Yeesu ahanyatulwa
kusogola ku mwanya, ahatendama ku luvhazu ulwa
kundiilo ulwa Mulungu pa vhushindamu uvhupiti
nkaani.



UMulungu ávhakunzite nkaani avhantu
avha mu nsi umu, ye nongwa
ánsonteleziize ne Mwana waakwe imozi,
kwinza mu nsi umu inga umuntu wonti we
akuniitiha atahateeje, nkandi avhwaje
uvhulanzi uvhwa shiima.



aVhaluumi 3:23

Yeenya, avhantu vhonti vhavhomvile uvhutalamalandu, nu kusheepelwa uvhushindamu uvhwa Mulungu.

aVhaluumi 6:23

Yeenya, amalipilo aga vhutalamalandu vhufwe, ileelo ishipeelwa she uMulungu akuutupa, vhulanzi uvhwa shiima kwi idala ilya Mwene wiitu uChilisiti uYeesu.

aVhahebuuli 9:27

Inza vwe avhantu vhonti vhakufwa lwoka vhweleeele, havhili lwe vhaafwa, uMulungu akuvhalonga,



aVhahefeeso 2:8,9

Kwe ku vhwila vhwakwe uMulungu avhaposile kwi idala ilya kumwitiha uChilisiti. Nalyoli, uvhuposhi uvhwo vhutakufumiilana niimwe, shipeelwa isha vhweleeele kufuma kwa Mulungu. Mutahapeelwa uvhuposhi ku mbombo zyinyu inyinza, inga nuumo atahinze ayitumvwe.

aVhaluumi 10:9,10

kuuti, inga wapemula ni ilomu lyaho weneewe kuuti, “UYeesu wu Mwene,” nu kwitiha mu mwoyo waaho kuuti uMulungu ámuzyusiize, ukupokwa. Yeenya, umuntu akwitiha nu mwoyo waakwe, pe akuvhaazilwa kuuti mugolosu, havhili akupemula ni ilomu lyakwe, pe akupokwa.



uYoohani 3:16,17

UMulungu ávhakunzite nkaani avhantu avha mu nsi umu, ye nongwa ánsonteleziize ne Mwana waakwe imozi, kwinda mu nsi umu inga umuntu woti we akuniitiha atahateeje, nkandi avhwaje uvhulanzi uvhwa shiima. Yeenya, uMulungu atánsonteleziize ne Mwana waakwe kuvhalonga avhantu avha mu nsi umu, nkandi kuvhapoha.

1 uYoohani 5:11-13

Uvhwahome uvhwo vhwe vhuno: UMulungu atupiiye uvhulanzi uvhwa shiima shiima, uvhulanzi uvhwo tukuvhwaga kwa Mwana waakwe. Umuntu we ali nu vhuliilani nu Mwana wa Mulungu, ali nu vhulanzi uvhwo. Ileelo we atali nu vhuliilani nu Mwana wa Mulungu, atali nu vhulanzi uvhwo. Nkuvhasimbila amazwi iga, imwe mwe mukulyitiha izina ilya Mwana wa Mulungu, inga mumanye kuuti muli nu vhulanzi uvhwa shiima shiima.



uMataayi 26-28; uLuuka 22-24; uYoohani 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Nyiha Tanzania NT (nih) © 2021 Wycliffe Bible
Translators, Inc.

<https://www.bible.com/en-GB/bible/3145/MAT.1.NIH>

©2026 Bible for Children, Inc.

www.M1914.org

www.bibleforchildren.org

